

gore: quod interdum his locis tam vehemens est, ut Equos cum fessoribus penitus constringat, & Marmoris instar induret. Pluvias, Fulmina, & totius anni mutationem sentit distinctis intervallis, haud aliter atque Europa: nisi quod illic æstas est quum nobis est hyems, mutatis rerum vicibus. Regio omnis partim maritima est, partim montana: quæ pars Mari vicinior est, ea magis calet. Terra natura sua fertilis, omniumque ad vitam necessariorum abundantissima, Melle, Verzinoque sive tinctorio ligno abundat. Gignit comprimis Piper longum: profert & laudatissimum Vinum comportatis eo ex Hispania palmitibus. Auri obrisi hic quoque ingens proventus. Fructus qui ex Hispania allati hic feruntur, facile crescunt. Magna hic Pecudum & Struthionum frequentia. Metropolis est Civitas *S. Iacobi*. Colonia Hispanorum, quam illuc nostra memoria duxerunt. Maritima multis fluminibus irrigantur, quæ colliquefactis diurno calore nivibus dilapsa summis Montium jugis, in Pacificum aut Magellanicum Æquor feruntur: sed plerique ob indomitum frigus noctu concreescunt, interdiu vero decurrunt soluto gelu. Montes hujus Regionis cæteris ita præcellunt, ut in universo Indiarum tractu similes non reperiantur.

Soli qualitas.
Soli fertilitas.

Urbs S. Iacobi.
Flumina.

Montes.

Superest Terra Orientalior *Brasilia*, a Verzino, sive coccinei Ligni illic enascentis copia sic dicta. Inter duos fluvios sita est, *Maragnon*, & *Della Plata*. Ea sic Maffæio describitur. *Brasilia* duobus ab Æquatore gradibus partibusve, ad gradus quinque & quadraginta in Austrum excurrens, trigoni oblongi speciem refert, cujus basis in Æquatorem & Septentriones obversa, ab Oriente in Occidentem recta protenditur. Angulus extremus ignotas ad Meridiem Regionem attingit. Latus in Orientem spectans, interposito Oceano Hesperijs Æthiopibus objacet. Alterum Latus a Provincia Peruana determinat juga Montium adeo celsa, ut ipsos avium volatus fatigare dicantur, uno duntaxat, quod adhuc exploratum sit, eoque difficillimo transitu. Regio tota imprimis amœna est, Cœli admodum jucunda salubrisque temperies: lenium quippe a pelago ventorum commodissimi flatus matutinos vapores ac nebulas tempestive disjiciunt, solesque purissimos ac nitidissimos reddunt. Terra partim in planiciem soluta, partim in colles clementer assurgens, felix præpinguibus glebis, & riguo solo, semperque vernante, credita semina multiplici redditu fœnore, & Sacchari præsertim est ferax. Quadrapedia hic plurima, sed ferme sylvestria, partim nota nobis, partim ignota: Avesque coloris eximij. Multæ hic Portugallensium Colonia, in quibus complura sunt ab ipsis ad Saccarum excoquendum constructa Edificia, nempe *Pernambicum*, *Caput S. Augustini*, *Portus omnium Sanctorum*, ubi Episcopalis & Præsidis totius Provinciae Sedes. Scater ea tota ferme plaga Fontibus ac Sylvis & amnibus inclytis: è quibus (ut reliquos taceam) is quem *Argenteum* vocant, leucarum quadraginta Ostio in Oceanum fertur, adeo violentus, ut inde Nautæ dulces hauriant latices, priusquam tellurem ex alto conspiciant. Nullos omnino Brasiliiani colunt Deos, Orientem tamen Solem venerantur, & Animarum immortalitatem credunt.

Brasilia.
Situs.

Celi temperies.

Soli fertilitas.
Animalium varietas.

Insula.
Mores.